

18 MAY 1996

Kolej

KOLEJ PERDANA MALAYSIA DIBUKA DI BANGLADESH

Oleh: Shafiqul Bashar

DHAKA, 18 Mei (Bernama) -- Kolej Perdana, sebuah institusi pengajian tinggi usahasama Malaysia-Bangladesh telah mula beroperasi di negara itu sejak awal tahun ini untuk memberi peluang kepada rakyat Bangladesh mendapat ijazah luar negeri dengan kos yang rendah.

Pengetuanya, Koay Chee Hoe, hari ini berkata, kolej itu boleh menampung 100 pelajar dan mengadakan kursus-kursus ijazah dalam bidang komputer perniagaan, sains komputer dan kursus diploma sains komputer yang mengambil masa setahun.

Beliau berkata, kolej itu digabungkan dengan Kolej Sedaya di Petaling Jaya dan programnya diasaskan kepada program kembar kolej itu dengan Universiti Winnipeg dan Universiti Acadia, di Kanada.

Menurut beliau, pelajar perlu menamatkan tahun pertama mereka di Kolej Perdana, tahun kedua di Kolej Sedaya di Kuala Lumpur dan semester akhir mereka untuk satu atau dua tahun di Kanada sebelum mendapatkan ijazah.

Kolej itu sekarang mempunyai empat pensyarah termasuk Koay, sementara tiga orang profesor Bangladesh dari Universiti Jahangirnagar di sini dijangka akan menyertainya.

Koay berkata penubuhan kolej itu adalah sebagai usaha menyahut seruan Perdana Menteri, Datuk Seri Dr Mahathir supaya hubungan dua hala antara Malaysia dan Bangladesh dalam bidang pendidikan diperkukuhkan.

Menurut beliau sambutan adalah menggalakkan dan kolej itu mempunyai rancangan untuk mempertingkatkan kemudahan-kemudahan dan mengadakan lebih banyak lagi program akademik. -- BERNAMA

SB WAT PR